

L'ESPOUVAN-
TABLE ET PRODIGIEUSE
VISION DES FANTOMES
au nombre de douze mille.


*Advenus au pays d'Angoumois, & vuez par les ha-
bitans de là, en grande admiration.*



A PARIS,
chez HEVREUX BLANVELAIN, rue
saint Victor, au trois Mores

M. D. C. V I I.

Jouxte la coppie imprimee à Perigueux.



LE SPOUVANTABLE ET
PRODIGIEUSE VISION DES
*fantosmes au nombre de
douze mille.*

Comme Dieu a veu les hommes
s'endurcir à ses promesses & me-
naces, comme l'enclume sous
les marteaux du forgeron, il a eu re-
cours à vn arrest presidental qu'il a don-
né en son conseil Eternel, de mort &
damnation eternelle. Il n'en reste plus
que l'execution, par les boureaux de la
haute iustice. Dequoy il nous en a ad-
uertis en plusieurs manieres, par la paro-
le, à laquelle il y a conioinct les signes, &
prodiges au ciel, en l'air, en terre, & en
l'eau: tous ces elements portants grauez
en leurs fronts les caracteres de la cho-
lere de l'Eternel. Vn chacun a creu, que

la paix en laquelle Dieu mercy nous sommes, nous deuoit estre en benediction: qu'elle nous deuoit apporter vn prix moderé à toutes choses, & principalement aux viures. Qui a iamais veu les marchandises à plus haut prix? quoy que tout le monde traficque? Qui est celuy qui ne souspire tous les ans voyant vne recolte si petite, & de bleds, & de vins, avec vne si grande cherté? cōbien que toutes les terres soyent auourd'hui labóurees, & les plaines & montagnes couuertes de bestail pour mieux les engraisser, pour cela elles n'en font plus fertiles, ny la viande à meilleur marché. De forte qu'il semble, que la nature se veut dementir elle-mesme touchant l'entretien du genre humain.

Que nous signifient aussi tant de prodiges qui paroissent à tous moments? la Comete l'an passé au mois d'Octobre l'espace de trois mois? l'hyuer dernier si

furieux qui a causé la mort en plusieurs
pays à cent mille ames en apparence
avant terme? Que dirons-nous du de-
bordement furieux & prodigieux de la
riuiere de Loyre? qui a rauagé les terres,
saccagé les maisons, desmoly les cha-
steaux, emporté les ponts, qui a causé la
mort à plusieurs milliers d'hommes, de
femmes, & de petits enfans; qui ont este
enveloppez inopinément, par la fureur
de ses ondes, sans pouuoir receuoir se-
cours quelconque, que par la mort
qu'ils ont soufferte pour le plus prompt
remede en leur extreme affliction:
Et n'osant passer plus auant dans ces
gouffres impitoyables dont il y a vn dis-
cours à part.

Je viens vous reciter comment au pays
d'Angoulmois, il a esté veu vne vision
espouuanteable de spectres & fantosmes,
il y a enuiron deux mois seulement en
cet an mil six cents huit. Ceste vision

brut en plain iour & fort clair par tout, lors en ce quartier où vers le ciel paroissoyent assez grand nombre de petits nuaux qui descendirēt en terre, dequoy se formoient comme des hommes, on pouuoit estimer le nombre iusques à douze mille.

Ils estoiet tous grands & beaux hōmes armez d'armes bleuēs, ils auoyēt des enseignes lesquelles estoient demy bleuēs & demy rouges, à demy desployes, les tambours auoient leur caisses sur l'espaule comme prest à battre. Il y auoit vn chef qui estoit d'vne grande apparence lequel marchoit à la teste de ceste armee enuiron dix pas deuant: elle marchoit en grand haste tenant vn ordre comme gents de guerre à trauers les champs, neantmoins elle estoit diuisee en bandes & troupes, chose qui fut fort espouuantable à tous ceux qui veirent ceste vision, & dont plusieurs paylants

prendrent tellement l'alarme, que
 croyant ceste armee estre veritablement
 des hommes de guerre, furent à leurs
 maisons pour emporter aux chasteaux
 voisins, ce qu'ils auoient de plus cher.
 Plusieurs gentils-hommes monterent
 à cheual pour recognoistre cela, & les
 suyurent, ils remarquerent que ceste
 armee s'approchant d'un bois taillis
 pour le passer & pour ne rompre point
 leur ordre, ils s'enleuerent tous par des-
 sus le bois, & touchoient des pieds la
 fucille des arbres, puis furent veuz ayant
 passé le boys encores à terre cheminans
 iusques vers vne forest, où tousiours la
 Noblesse du pays les suyuoit pour sça-
 uoir ce qu'ils deuiédroient: En fin ils en-
 trerent dans ceste forest où ils se perdi-
 rent tous, & depuis ne parurent plus.
 Iugez messieurs que peut predire ces
 spectres, ces symboles de guerre: car ils
 sembloient à vne armee qui se haste d'al-

ler en quelque expedition notable, ou pour faire quelque rauage en pays d'ennemy. Les naturalistes perdent en ce leur escrime. Il faut donc dire que c'est vne chose supernaturelle, où le sens & la raison humaine ne voit goutte par les raisons & maximes de Physique. De tout cecy, plus de trois cents personnes de qualité l'ont certifié par escrit & signé de leur main, lequel ils ont enuoyé au Roy.